

Arondino Croes despues di 16 año ta bandona partido MEP

ORANJESTAD -- Durante un conferencia di prensa yama pa politico Arondino Croes cu ta forma parti di partido di Movimiento Electoral di Pueblo (MEP), Croes a duna di conoce cu e a entrega su retiro di e partido, como miembro di partido, miembro di directiva como secretario internacional y tambe como miembro di consejo.

Les a pagina A5



Arondino Croes despues di 16 año ta bandona partido MEP

Continuacion pagina 1

POSICION RIBA LISTA

“Mi kier a cuminsa na gradici e pueblo di Aruba pa e sosten cu mi a haya y na mi 364 votadonan y tur miembronan di prensa pa nan sosten”, Croes a bisa. E ta sigui bisa cu e decision di tuma su retiro ta uno cu ta andando pa algun tempo caba unda e motibo principal ta e posicion cu su persona a haya riba lista pa e eleccion 2013. Segun Croes, dia cu esaki a sosode dia 8 di augustus, su hendenan a bisa Croes cu e merece miho, pero como cu e ta un persona cu ora e cuminsa algo e ta termina e proyecto, el a sigui cu tur su forsa y profesionalismo pa por caba di termina e tarea cu el a haya.

SEÑAL

“Den bida bo tin cu comprende señalnan ora nan ta bin p’abo y ora mi wak con e grupo strategico y conseheronan a pone mi den un posicion cu mi no por contribui mas den e partido, unda awor aki bo ta wak e representacion den parlamento, mi ta duna espacio pa esaki, pa nan por haci loke nan kier haci pasobra den bida mester tin un balans den experiencia y bo ‘rookies’”, Croes a bisa. Posicionando cierto miembro den cierto posicion pa nan bay muri, ta un señal pa su persona cu e mester comprende cu no tin espacio mas pe.

RESPETA

Croes ta bisa cu den parlamento, e a percura pa hiba discursonan di calidad evitando di bay den discusionnan personal. Tambe e a dicidi pa atende reunionnan publico, cual e a haci atendiendo 95% di e reunionnan publico cual tambe ta documenta den parlamento. Segun su persona, ora e a mira e posicionamento riba lista e a mira cu e dos puntonan aki no a wordo reconoci. “Mi a ta respeta con nan a posiciona tur hende, mi no tin problema cu niun colega ni tampoco ta sali den forma di problema ni pelea pero den tranquilidad”. Croes ta spera cu mescos cu e a respeta partido nan decision, e ta spera cu nan tambe por respeta di dje na un nivel profesional.

COMENTARIO

E ta bisa cu e a cera un capitulo y djey e lo bay wak kico e lo bay haci. Comentarionan publica cu si e a wordo cumprá, Croes ta indica cu e no ta na benta, pero e tin su prestigio y su estudio cu e a lucha

pe. “Despues di 31 di october, ora mi ta keda sin trabou, ta keda mi 2 caminda, mi por bay den sector publico of den sector priva. Pero mi ta caba mi trabou cu partido despues di 16 año sirbiendo MEP, bayendo 5 eleccion y 3 biaha den parlamento. Awor aki a yega e momento cu Arondino merece miho unda mi lo no ta bay ta kenta banki pero lo hunga bala den veld, sea den a parti educativo y experiencia politico”, Croes a bisa. □

